



Na osnovu člana 3. stav (1) i člana 140. stav (5) Zakona o službi u OS BiH („Službeni glasnik BiH“ broj:88/05, 53/07, 59/09, 74/10 i 42/12), u skladu sa članovima 2, 20, 21, 22, 23, 24, 25, 26 i 27. Pravilnika o školovanju i usavršavanju u MO i OS BiH broj: 13-02-3-1632/10 od 01.04.2010.godine, a u cilju odabira kandidata za školovanje na Vojnim akademijama u inostranstvu, Ministarstvo odbrane Bosne i Hercegovine raspisuje,

JAVNI KONKURS

za izbor kandidata za školovanje kadeta na Zrakoplovnoj vojnoj akademiji u Sjedinjenim Američkim Državama za školsku 2016/2020. godinu

I – Ministarstvo odbrane Bosne i Hercegovine raspisuje javni konkurs za izbor kandidata za školovanje kadeta na Zrakoplovnoj vojnoj akademiji u Sjedinjenim Američkim Državama za školsku 2016/2020. godinu.

II – Školovanje u Sjedinjenim Američkim Državama traje četiri godine, počevši od školske 2016/2017. godine.

Odabrani kandidati će tokom školovanja imati svojstvo kadeta, čija će prava i obaveze biti regulisane u skladu sa članom 73, 142. i 143. Zakona o službi u Oružanim snagama Bosne i Hercegovine („Službeni glasnik BiH“, broj: 88/05, 53/07, 59/09, 74/10 i 42/12).

Ministarstvo odbrane Bosne i Hercegovine će kadetima za vrijeme školovanja osigurati novčana primanja u skladu sa članom 29. Zakona o plaćama i naknadama u institucijama Bosne i Hercegovine („Službeni glasnik BiH“, broj: 56/08, 35/09, 75/09, 87/10, 32/12 i 42/12).

Za vrijeme školovanja kadetima su osigurani smještaj i ishrana u internatu Vojne akademije.

Po završetku školovanja, kadeti će biti primljeni u vojnu službu u početnom činu oficira Oružanih snaga Bosne i Hercegovine, potporučnik (OF-1), odgovarajućeg roda-službe.

Međusobne obaveze kandidata izabranih za školovanje na vojnoj akademiji u Sjedinjenim Američkim Državama i Ministarstva odbrane Bosne i Hercegovine regulisaće se ugovorom o školovanju.

III – USLOVI KONKURSA

1. Opći uslovi prijema su propisani članom 9. Zakona o službi u Oružanim snagama BiH ("Službeni glasnik BiH broj: 88/05, 53/07, 59/09, 74/10 i 42/12") :

- a) da je državljanin/ka Bosne i Hercegovine,
- b) da je zdravstveno sposoban/na za službu u Oružanim snagama,
- c) da nije osuđivan/a na bezuslovnu kaznu zatvora u trajanju dužem od šest mjeseci,
- d) da nije prethodno otpušten/a iz državne službe ili pravnog lica zbog povrede službene dužnosti u posljednje tri godine,
- e) da se protiv njega/nje ne vodi krivični postupak za krivično djelo za koje se goni po službenoj dužnosti,
- f) da mu/joj pravosnažnom presudom nije zabranjeno obavljanje određenih djelatnosti, odnosno dužnosti za vrijeme trajanja takve zabrane,
- g) da ima odgovarajuću stručnu spremu potrebnu za obavljanje određene dužnosti. (Uslov koji će biti ispunjen po završetku vojne akademije).

2. Posebni uslovi:

- a) završena srednja škola IV stepen, i da je u svakom razredu postigao/la najmanje vrlo dobar uspjeh kao i da mu/joj je prosjek ocjena iz matematike i fizike najmanje dobar,
- b) ili da trenutno pohađa IV razred srednje škole i da je u svakom završenom razredu, postigao/la najmanje vrlo dobar uspjeh i da mu/joj je prosjek ocjena iz matematike i fizike najmanje dobar,
- c) kandidati/kinje koji trenutno pohađaju IV razred srednje škole, po završetku istog, moraju u svjedočanstvu imati minimalno isti prosjek iz svih predmeta kao i u svjedočanstvu trećeg razreda koje su predali u dokumentima za prijavu na javni konkurs i minimalno isti prosjek ocjena iz matematike i fizike kao u svjedočanstvima koja su predali u dokumentima za prijavu na javni konkurs,
- d) kandidati/kinje koji trenutno pohađaju IV razred srednje škole, po završetku istog, a najkasnije do 15.06.2016.godine, moraju dostaviti original ili ovjerene kopije svjedočanstva i diplome Sektoru za upravljanje personalom Ministarstva odbrane Bosne i Hercegovine,
- e) da nije mlađi/a od 18 i stariji/a od 22. godine na dan 01.07.2016. godine,
- f) znanje engleskog jezika (na provjeri poznavanja engleskog jezika da ostvari rezultat od minimalno 80% ALCPT)
- g) poznavanje rada na računaru (Word, Excel, Power Point, Internet).

Fizička spremnost:

- kandidati/kinje moraju imati dobru fizičku spremnost, koja će biti provjerena od strane Komisije za izbor kandidata/kinja za školovanje za kadete Ministarstva odbrane Bosne i Hercegovine u skladu sa normama propisanim od strane Kopnene vojne akademije u Sjedinjenim Američkim Državama.

Napomena: Svi kandidati/kinje čije prijave na Javni konkurs budu prihvaćene, proći će test fizičke spremnosti, test općeg znanja, test iz poznavanja engleskog jezika i intervju. Sigurnosnu provjeru za svakog uspješnog kandidata izvršiće nadležni sektor Ministarstva odbrane Bosne i Hercegovine, a zdravstveni pregled kandidata/kinja koji uspješno prođu testiranje i provjere obaviti će nadležna ustanova u organizaciji Ministarstva odbrane Bosne i Hercegovine.

Rangiranja kandidata/kinja vršit će se na osnovu odobrenih kriterija od strane Ministrice odbrane Bosne i Hercegovine sa kojima će biti upoznati kandidati/kinje koji budu pozvani na testiranja i provjere.

Testiranjima, provjerama i intervju sa kandidatima/kinjama pored komisije za izbor kandidata/kinja za školovanje kadeta Ministarstva odbrane Bosne i Hercegovine biće prisutni i predstavnici Ureda za saradnju iz oblasti odbrane Ambasade Sjedinjenih Američkih Država u Bosni i Hercegovini

Rang listu kandidata/kinja za prijem za školovanje kadete na Zrakoplovnoj vojnoj akademiji u Sjedinjenim Američkim Državama, Ministarstvo odbrane Bosne i Hercegovine dostavlja vojnoj akademiji preko Ureda za saradnju u oblasti odbrane Ambasade Sjedinjenih Američkih Država u Bosni i Hercegovini, koja će izvršiti konačan izbor za kadete na vojnim akademijama.

3. Posebni uslovi prema kriterijima akademija u Sjedinjenim Američkim Državama

- a) položen Scholastic Aptitude Test (SAT kod za Zrakoplovnu vojnu akademiju je 4830) najkasnije do 30.11.2015.godine za Zrakoplovnu vojnu akademiju. Sve informacije o polaganju SAT testa se mogu pronaći na web stranici <http://sat.collegeboard.org>
- b) položen test engleskog kao stranog jezika (TOEFL) najkasnije do 30.11.2015.godine za Zrakoplovnu vojnu akademiju. Sve informacije o polaganju TOEFL testa se mogu pronaći na web stranici <http://www.ets.org>
- c) provjeru fizičke spremnosti realizovat će Komisija Ministarstva odbrane Bosne i Hercegovine u saradnji sa Uredom za saradnju iz oblasti odbrane Ambasade Sjedinjenih Američkih Država u Bosni i Hercegovini, po kriterijima propisanim od strane Zrakoplovne vojne akademije. Provjera fizičke spremnosti će se realizovati kroz sljedeće discipline: trčanje 1600 m (1 milja), shuttle test (sprint), trbušnjaci, zgibovi, bacanje košarkaške lopte i sklekovi. Sve informacije o kriterijima za polaganje testa fizičke spremnosti su navedene na web stranicama:
<http://www.westpoint.edu>
<http://www.academyadmissions.com>
- d) da kandidat/kinja posjeduje snažan potencijal za buduće vođe kroz
 - aktivno učešće u vannastavnim aktivnostima,
 - učestvovanje na školskim ili lokalnim sportskim natjecanjima,
- e) preporuke nastavnog osoblja srednje škole koju je kandidat/kinja pohađao/la ili pohađa,
- f) da kandidat/kinja nije oženjen/udata, da nije u drugom stanju i da nema zakonsku obavezu izdržavanja djece.

Zdravstveni uslovi:

- a) da kandidat/kinja ne boluje od zaraznih oboljenja (HIV, TBC, hepatitis) kao i da ne boluje od astme i oboljenja srca,
- b) da ima odličan vid i da nema problema koji bi mogli predstavljati prepreku za treniranje boksa (deformacija rožnjače RK, PRK, laserska korekcija vida),
- c) da dobro podnosi velike vrućine i da nema sklonost ka dobijanju sunčаницe,
- d) da nije u drugom stanju,
- e) da nema zubnih oboljenja i/ili drugih stomatoloških problema koji bi mogli predstavljati prepreku u treniranju boksa,
- f) da nema povredu glave koja bi mogla predstavljati prepreku u treniranju boksa.

IV POTREBNI DOKUMENTI

- a) prijavni formular i biografija, isključivo po obrascu (www.mod.gov.ba),
- b) original ili ovjerena fotokopija diplome završene četverogodišnje srednje škole, ili original potvrda o redovnom pohađanju IV razreda srednje škole kao i ovjerena kopija na engleskom jeziku i ovjerena od strane sudskog tumača,
- c) ovjerene fotokopije svjedočanstava svih razreda srednje škole kao i kopije svjedočanstava svih razreda prevedene na engleski jezik i ovjerene od strane sudskog tumača,
- d) ukoliko je kandidat/kinja pohađao/la ili završio/la školu u inostranstvu potrebno je da dostavi nostrifikovanu diplomu ili ekvivalenciju svjedočanstava završenih razreda u inostranstvu od strane nadležnog organa, original ili ovjerenu fotokopiju,
- e) original ili ovjerena kopija uvjerenja o državljanstvu ne starije od 6 (šest) mjeseci,
- f) original ili ovjerena kopija izvoda iz matične knjige rođenih ne starije od 6 (šest) mjeseci, kao i original ili ovjerena fotokopija prevedena na engleskom jeziku i ovjerena od strane sudskog tumača,
- g) original ili ovjerena kopija uvjerenja o nevođenju krivičnog postupka ne starije od 3 (tri) mjeseca izdato od nadležnog suda,
- h) ovjerena izjava ili potvrda (uvjerenje) institucije/pravnog lica da u posljednje tri godine nije otpušten/a zbog povrede službene dužnosti (za kandidate/kinje koji su bili ili su još uvijek zaposleni) ili ovjerena izjava kandidata/kinje da nije bio zaposlen,
- i) original ili ovjerena kopija prijave prebivališta CIPS-a ne starija od 6 (šest) mjeseci,
- j) ovjerena izjava od podnosioca prijave da nema zakonsku obavezu izdržavanja djece,
- k) dokaz o položenim SAT i TOEFL testovima (najkasnije do 30.11.2015.godine dostaviti printanu verziju rezultata, koji su dostavljeni na email lica koje je polagalo test predsjedniku komisije za izbor kandidata/kinja za kadete Ministarstva odbrane Bosne i Hercegovine),
- l) ukoliko je kandidat/kinja učestvovao na školskim ili lokalnim sportskim natjecanjima potrebno je da dostavi original ili fotokopiju priznanja prevedenu na engleski jezik i ovjerenu od strane sudskog tumača,
- m) pismo preporuke nastavnog osoblja srednje škole koju je kandidat/kinja pohađao/la (prevedeno na engleski jezik od strane sudskog tumača),
- n) dokaz o poznavanju rada na računaru (certifikat o završenom kursu), ukoliko kandidat/kinja nije imao/la predmet informatiku tokom školovanja.

Napomena: Prevod dokumenata pod b), c), f), l) i m) na engleski jezik će dostaviti kandidati/kinje koji uspješno završe testiranja i provjere do 30.11.2015.godine predsjedniku komisije za izbor kandidata za prijem kadeta Ministarstvu odbrane Bosne i Hercegovine), a na lokalnom jeziku moraju biti predati do datuma određenog Javnim konkursom za predaju dokumenata.

V ODABIR KANDIDATA

Izbor kandidata/kinja izvršiće Komisija koju će formirati Ministrica odbrane Bosne i Hercegovine.

VI PRIJAVA NA JAVNI KONKURS

Sve tražene dokumente treba dostaviti putem poštanske službe preporučeno na adresu:

Ministarstvo odbrane Bosne i Hercegovine

Ul. Hamdije Kreševljakovića 98

71 000 Sarajevo

Sa naznakom „Javni konkurs za izbor kandidata za školovanje kadeta na Zrakoplovnoj vojnoj akademiji u SAD 2016/2020“

i na email eucom.stuttgart.ecj5-8.list.bosniaherzegovina@mail.mil

Sa naznakom „Interested in U.S. Service Academy”

Konkurs ostaje otvoren do 03.11.2015.godine. Ispunjavanje uslova utvrđenih ovim Javnim konkursom računa se danom predaje prijave.

Kandidati/kinje koji konkurišu za Zrakoplovnu vojnu akademiju mogu konkurisati i na Kopnenu vojnu akademiju, ako su zainteresovani, uz prilaganje potrebnih dokumenata.

Nepotpune, neblagovremene i neuredne prijave, prijave kandidata koji ne ispunjavaju uslove ovog Javnog konkursa, kao i kopije tražene dokumentacije koje nisu ovjerene, neće se uzimati u razmatranje.

Broj:10-33-2-3868-1/15
Sarajevo, 09.10.2015.godine

MINISTRICA
Marina Pendeš